

UPA 2024/75: Namminersorneq pillugu Inatsimmi § 21 atuutilersinneqarnissaa siunertaralugu ataatsimiititaliamik pilersitsisoqarnissaanik Naalakkersuisut peqquneqarsinnaannik Inatsisartut aalajangiiffigisassaattut siunnersuut.

(Inatsisartunut Ilaasortaq, Kuno Fencker, Siumut)

UPA 2024/123: Inatsisartunut qinersinissamut atatillugu Naalagaaffinngornissaq pillugu isumasiuilluni innuttaasut taasitinneqarnissaannik Naalakkersuisut peqquneqarnissaat pillugu Inatsisartut aalajangiiffigisassaattut siunnersuut.

(Inatsisartunut Ilaasortaq, Aqqalu C. Jerimiassen, Atassut)

Akissuteqaat

(Naalagaaffinngornissamut Nunanullu allanut Naalakkersuisoq)

Aappassaaneerneqara

Siunnersuutit pillugit Inatsisinut Ataatsimiititaliap sukumiisumik peqqissaartumillu suliaqarsimaneranut Naalakkersuisut qujapput.

Naalakkersuisut takusinnaavaat Namminersorneq pillugu inatsimmi § 21-ip atuutilersinneqarnissaanut ataatsimiitsitaliamik pilersitsisoqarnissaa amerlanerussuteqartunit taperserneqartoq. Taamatullu naatsumik nalunaarusiortoqassasoq aalajangersakkap suliniutiginerani alloriarnerit tamaasa pillugit nassuiaasumik, ataatsimiititaliap katitigaasinnaanera piffissalerneqarsinnaaneralu ilanngullugit. Nalunaarusiamilu, Inatsit Tunngaviusussamut siunnersuut pioreersup nalilersorneqarnissaa aammalu innuttaasut taasitinneqarnissaannut sinaakkutissanik tunngaviusussanik nalilersuineq ilaneqassasoq. Tamakku Naalakkersuisunit Inatsisartunut tunniunneqarnissaat isumagiumaarparput.

Qulequttat Naalagaaffinngornissaq Inatsit Tunngaviusussarlu pillugit innuttaasunik oqaloqateqarnissaq pisariaqartoq Naalakkersuisut ilisimavaat. Tamannalu tunngavigalugu innuttaasunik akuutitsinissamut piareersarneqarpoq, tamannalu naalagaaffinngornissamut immikkoortortaarfimmi suliaassatut pingaartutut inissisimalluni.

Nalunaarusiaq ataatsimiititaliamik malitseqartusaaq, alloriarnerit qanoq isikkoqarsinnaanerinik paasinninnerulernissamut nukittorsaataassaaq, aammalu suut naatsorsuutigineqarsinnaanersut Nunatta Naalagaaffinngornissaanut.

Taamatut oqaaseqaateqarlunga siunnersuutaasut Inatsisartuni eqqartugassanngorlugit ingerlateqqipparput.